



Samningur um rekstur umdæmisráðs barnaverndar fyrir sveitarfélögin á Suðurnesjum og Árborg

1. gr.

Umdæmisráð barnaverndar, aðild og lagagrundvöllur

Sveitarfélögin Reykjanesbær, Grindavík, Suðurnesjabær, Vogar og Árborg reka saman umdæmisráð barnaverndar.

Samningur þessi er gerður með vísan til 14. gr. barnaverndarlaga nr. 80/2002 þar sem fjallað er um skipan umdæmisráðs barnaverndar.

Önnur sveitarfélög geta orðið aðilar að umdæmisráðinu með samþykki allra aðildarsveitarfélaga og með undirritun viðauka við samning þennan.

2. gr.

Skipan umdæmisráðs

Aðildarsveitarfélögin skulu koma sér saman um skipan fjögurra manna valnefndar sem fær umboð sveitarfélaganna til að ganga frá skipan umdæmisráðs barnaverndar. Ef skipa þarf nýjan aðal- eða varamann á skipunartíma ráðsins annast valnefnd þá skipan einnig.

Ef ráðsmaður óskar lausnar eða er vikið úr ráðinu vegna framkomu hans eða skorts á almennu hæfi til setu í því skal skipa nýjan ráðsmann í hans stað til þess tíma sem eftir er af skipunartíma ráðsins. Staðið skal að skipun nýs aðal- eða varamanns með sama hætti og upphaflegri skipan.

Um hæfi ráðsmanna fer samkvæmt 2. mgr. 14. gr. barnaverndarlaga.

Skipunartími ráðsmanna er frá 1. janúar 2023 til 31. desember 2027.

3. gr.

Verkefni umdæmisráðs

Með samningi þessum fela aðildarsveitarfélögin umdæmisráðinu öll þau hlutverk sem því eru fengin í barnaverndarlögum og eftir atvikum öðrum lögum.

Umdæmisráð eru sjálfstæð í störfum sínum og standa utan við almenna stjórnslu sveitarfélaga. Ráðsmenn umdæmisráðs barnaverndar taka ekki við fyrirmælum um meðferð einstakra mála.

Umdæmisráð tekur eftirfarandi ákvarðanir með úrskurði sbr. tilvitnuð ákvæði barnaverndarlaga:

1. Beiting úrræða án samþykkis foreldra, sbr. 26. gr.
2. Vistun barns utan heimilis í allt að fjóra mánuði, sbr. 27. gr.

3. Heimild til barnaverndarþjónustu um að gera kröfu fyrir dómi um vistun barns í allt að tólf mánuði, sbr. 28. gr.
4. Heimild til barnaverndarþjónustu um að gera kröfu fyrir dómi um forsjárviptingu, sbr. 29. gr.
5. Umgengni í fóstri og við vistun, sbr. 74. og 81. gr.

Barnaverndarþjónusta undirbýr og fer fram á úrskurð umdæmisráðs barnaverndar vegna mála sem lúta úrskurðarvaldi ráðsins. Þegar farið hefur verið fram á úrskurð umdæmisráðs getur ráðið lagt fyrir barnaverndarþjónustu að afla frekari gagna sem ráðið telur nauðsynleg til að komast að niðurstöðu í málinu.

Umdæmisráðið annast sjálft ritun úrskurða og boðun funda með málsaðilum.

Formaður umdæmisráðs birtir málsaðilum niðurstöður umdæmisráðs.

Um ályktunarhæfi og form úrskurða umdæmisráðs barnaverndar fer samkvæmt stjórnsýslulögum.

Þegar fyrir liggur úrskurður umdæmisráðs barnaverndar ber barnaverndarþjónustu án tafar að koma honum til framkvæmdar í samræmi við hagsmuni barnsins.

Gögn sem verða til hjá umdæmisráði barnaverndar, skulu varðveitt hjá barnaverndarþjónustu í gagnagrunni viðkomandi barnaverndarþjónustu. Umdæmisráð barnaverndar hefur aðgang að gögnum mála hjá viðkomandi barnaverndarþjónustu.

4. gr.

Aðbúnaður og aðsetur umdæmisráðs og tengiliðir

Umsýslusveitarfélög munu fyrir hönd aðildarsveitarfélaga leggja aðal- og varamönnum til fullnægjandi tölvubúnað til starfa sinna.

Umdæmisráð mun hafa fast aðsetur hjá Sambandi sveitarfélaga á Suðurnesjum, Skógarbraut 945 Reykjanesbæ. Ef aðildarsveitarfélög óska eftir að halda fundi annar staðar fá ráðsmenn greiddan útlagðan ferðakostnað samkvæmt framlögðum reikningum.

Yfirmaður barnaverndarþjónustu í hverju aðildarsveitarfélagi annast nauðsynleg samskipti við umdæmisráð barnaverndar.

Formaður umdæmisráðs hefur yfirstjórn ráðsins með höndum og er tengiliður umdæmisráðs við aðildarsveitarfélög og barnaverndarþjónustur þeirra.

5. gr.

Þóknun ráðsmanna

Ráðsmenn fá greidda þóknun fyrir hvern boðaðan fund í ráðinu. Þóknun formanns er 100.000 kr.pr.fund, þóknun annarra aðalmanna er 50.000 kr. Ráðið fundar á dagvinnutíma.

Auk fastrar þóknunar er greidd sérstök þóknun fyrir hvert mál sem kemur til kasta ráðsins. Úrskurður í málum systkina getur talist sem eitt mál ef þeir eru samhljóða.

Þóknun formanns er 200.000 kr. fyrir hvert mál en þóknun annarra sem taka þátt í meðferð málsins, hvort sem það eru aðal- eða varamenn er 100.000 kr.

Úrskurðir varðandi umgengnismál sbr. 74. og 81. gr. bvl. hafa lægri þóknun. Formanni eru greiddar 100.000,- kr. og öðrum ráðsmeðlimum 50.000,- kr. Úrskurðir um systkini teljast sem ein fyrirtaka eða greiðsla.

Ofangreindar upphæðir munu framreiknast samkvæmt launavísitölu árlega miðað við grunnvísitölu í janúar 2023, fyrsta hækkun tekur gildi í janúar 2024. Sveitarfélög er standa að umdæmisráði barnaverndar á Suðurnesjum og Árborg geta endurskoðað ofangreindar upphæðir með sameiginlegri ákvörðun allra aðildarsveitarfélaga umdæmisráðsins.

6. gr.

Skipting kostnaðar milli sveitarfélaga

Föst þóknun ráðsmanna sbr. 1. mgr. 5. gr. og almennur kostnaður við rekstur ráðsins sbr. 1. mgr. 4. gr. skiptist milli sveitarfélaga í samræmi við fjölda íbúa sem Hagstofa Íslands birtir 1. janúar ár hvert.

Kostnaður vegna einstakra mála sbr. 2. og 3. mgr. 5. gr. greiðist af viðkomandi sveitarfélagi.

Sveitarfélagið Reykjanesbær sinnir umsýslu frá og með 1. Janúar 2023 til og með 31. Desember 2027. Þar undir heyrna greiðslur til ráðsmanna sbr. 5.gr. sem og annar sameiginlegur kostnaður sem fellur til og rúmast innan sameiginlegs rekstrar ráðsins. Umsýsla kostnaðar umdæmisráðs næsta skipunartímabil færast til annarra sveitarfélaga er aðild eiga að samningum þessum. Umsýslusveitarfélag sendir mánaðarlega reikninga til aðildarsveitarfélaga.

7. gr.

Úrsögn sveitarfélags

Ákveði sveitarfélag að hætta aðild að umdæmisráð skv. samningi þessum skal viðkomandi sveitarfélag tilkynna það með skriflegum hætti til aðildarsveitarfélaga. Tekur úrsögn þá gildi við næstu mánaðamót að því gefnu að sveitarfélagið hafi greitt upp allan þann kostnað sem því ber sbr. 5. gr.

8. gr.

Gildistaka

Samningur þessi öðlast gildi 1. janúar 2023 og gildir til 31. desember 2027.

Staðfesting samnings þessa er einnig staðfesting á erindisbréfi valnefndar umdæmisráðs á Suðurnesjum og Árborg sem tekur gildi 1. janúar 2023.

Samningur er staðfestur með rafrænni undirritun.

Fjóla Steindóra Kristinsdóttir bæjarstjóri f.h. sveitarfélagsins Árborgar

Gunnar Axel Axelsson bæjarstjóri f.h. sveitarfélagsins Voga

Kjartan Már Kjartansson bæjarstjóri f.h. Reykjanesbæjar

Magnús Stefánsson bæjarstjóri f.h. Suðurnesjabæjar

Nökkvi Már Jónsson sviðsstjóri félagsþjónustu-og fræðslusviðs f.h. Grindavíkur